



**Äntwert vun der Madamm Justizminister, Elisabeth MARGUE, op d'parlamentaresch Fro n° 4002 vum 29. Abrëll 2026 vum honorabelen Deputéierten, Marc GOERGEN, iwwert de Strofvollzuch mat elektronischer Iwwerwaachung.**

- 1. Wéi vill Demandë fir elektronesch Iwwerwaachung goufen an deene leschte 5 Jore gestallt a wéi vill dovunner goufe refuséiert oder ugeholl ? Aus wéi enge Grënn goufen d'Demanden net ugeholl ?**
- 2. Wéi sinn déi gesetzlech Konditiounen, déi eng Persoun erfëlle muss, fir en Antrag op eng elektronesch Iwwerwaachung ze stellen an accordéiert ze kréien ?**

Et ass ufanks wichteg ze betounen, datt d'Decisioun, eng verurteelt Persoun ënner elektronesch Iwwerwaachung op Basis vum Artikel 688 vum Code de procédure pénale ze setzen, net onbedéngt vun enger Demande vun där Persoun ofhänkt.

Laut Artikel 673, Paragraph 1 vum Code de procédure pénale kann den Délégué du Procureur général d'État à l'exécution des peines unilateral entscheeden, eng elektronesch Iwwerwaachung ze accordéieren, wann d'Viraussetzungen erfëllt sinn (bei enger Prisongsstrof vu manner wéi dräi Joer oder wou nach dräi Joer ofzesetze bleiwen, esou wéi et am Artikel 688 vum Code de Procédure pénale virgesinn ass). Sou kann, wann en Dossier beim Service de l'exécution des peines erakënnt, den Délégué – nach virun all Decisioun iwwer eng Inhaftéierung am Centre pénitentiaire de Luxembourg (CPL) oder am Centre pénitentiaire de Givenich (CPG) a wann d'Konditiounen vum uewe genannten Artikel 688 erfëllt sinn – den Dossier un de Service central d'assistance sociale (SCAS) weiderginn, fir eng sozial Enquête duerchzeféieren, esou wéi et am Artikel 673, Paragraph 4 vum Code de procédure pénale virgesinn ass.

No dëser Enquête gëtt de Probatiousagent vum SCAS säin Avis of, an deem hien ënner anerem d'Afféierung vun enger elektronischer Iwwerwaachung recommandéiere kann. An deem Kader gëtt och eng technesch Enquête duerchgefouert, fir ze iwwerpräiwen, ob d'Installatioun vum Material fir d'elektronesch Iwwerwaachung beim Detenu doheem méiglech ass. Den Delegéierte hält duerno d'Decisioun, ob déi verurteelt Persoun vun dëser spezieller Form vun der Strofausféierung profitéiere kann oder, am Géigendeel, am CPL oder am CPG ënnerbruecht gëtt.

Bei dëser Decisioun ginn ënner anerem och Elementer wéi d'Personalitéit vum Verurteelten, säi Verhalen, seng Astellung vis-à-vis vum Affer an de Schutz vun den Interesse vum Affer, d'Preventioun vun enger Réckfällgeket souwéi eng méiglech Fluchtgefor berücksichtegt. Déi elektronesch Iwwerwaachung kann zousätzlech nach u bestëmmte Konditiounen gekoppelt sinn (z. B. d'Bezuele vun de Geriichtskäschten, d'Entscheidung vun de Zivilparteien, asw.).

An deenen anere Fäll gëtt d'Demande vum Gefaangenen oder vu sengem Affekot am Laf vum Strofvollzuch gestallt. Dës Demande gëtt da vum Delegéierte fir de Strofvollzuch op déi selwecht Aart a Weis behandelt wéi hei virdru beschriwwen.

Allgemeng gëllt: De Verurteelte kann ënner elektronesch Iwwerwaachung gesat ginn, wann d'Prisongsstrof dräi Joer net iwwerschreit oder wann de Rescht vun enger ursprénglech méi héijer Strof nach héchstens dräi Joer dauert, a wann hien nowiese kann, datt hien entweder enger berufflecher Aktivitéit noheet, och wann dës nëmme provisoresch ass, e Stage, eng Schoul oder eng



berufflech Formatioun am Kader vu senger Aschreiwung als Demandeur d'emploi bei der ADEM suivéiert, oder effektiv um Familljeliewe bedeelegt ass oder nach aus medezineschen oder therapeutische Grënn eng Behandlung muss suivéieren. D'elektronesch Iwwerwaachung kann och mat anere Modalitéite vun der Exekutioun vun der Strof kombinéiert ginn, déi am Code de Procédure pénal virgesi sinn, wéi och schonns uewen erwäant. Sou gëtt drun erënnert, datt nieft de Konditioune vum Artikel 688, den Delegéierten och déi geriichtlech Virgeschichten an d'Critèrë berécksiichtegt, déi am Artikel 673, Paragraph 2 vum Code de procédure pénale ernimmt sinn, fir de Strofvollzuch individuell unzepassen (d'Personalitéit vum Veruerteelten, d'ASTellung zum Affer asw.).

D'Moosnam gëtt decidéiert nodeems eng sozial Enquête vum SCAS an eng technesch Enquête op Ufro vum Procureur général d'État duerchgefouert goufen, esou wéi et schonn erkläert gouf. D'Zäit ënner elektronischer Iwwerwaachung gëtt op d'Dauer vun der Strof ugerechent.

Fir komplett ze sinn ass nach ze bemierken, datt sech an de leschte fënnef Joer d'Zuele vun den elektronischen Iwwerwaachungen, déi vum Service de l'exécution des peines vum Parquet général accordéiert oder refuséiert goufen, wéi folgend presentéieren :

Tableau 1 : Décisions prises en total dans le cadre de la surveillance électronique

	2021	2022	2023	2024	2025
Placements sous surveillance électronique accordés	30	21	32	42	30
- <i>Placements directs accordés</i>	22	10	23	17	27
- <i>Demandes de placements accordées</i>	8	11	9	25	3
Demandes de placements refusées	29	28	13	11	21
<b>Total : Décisions dans le cadre de la surveillance électronique</b>	<b>59</b>	<b>49</b>	<b>45</b>	<b>53</b>	<b>51</b>

Tableau 2 : Décisions prises sur demande des personnes condamnées ainsi que les révocations :

<i>(Source : Excel SEP)</i>	2021	2022	2023	2024	2025
Demandes accordées	8	11	9	25	3
Demandes non accordées	29	28	13	11	21
Révocations	0	1	0	6	4



Figure 1 : Part des décisions dans le cadre de la surveillance électronique :





Figure 2 : Part des décisions dans le cadre de la surveillance électronique (2021 - 2025)



**3. Wat sinn déi medezinesch Konditiounen, déi eng Persoun erfëlle muss, fir en Antrag op eng elektronesch Iwwerwaachung ze stellen an accordéiert ze kréien ? Wéi ginn extern medezinesch Expertisen, déi d'inaptitude à la détention zertiféiere bewäert a wéi säi Constat ass hei ausschlaggebend an decisiv fir een Accord ?**

Et gëtt keng gesetzlech Bedéngung am Zesammenhang mam Gesondheitszoustand vun der verurteelter Persoun, fir datt si vun engem Placement ënner elektronesch Iwwerwaachung profitéiere kann. Dësen Aspekt ass net ausschlaggebend fir eng elektronesch Iwwerwaachung zouzegestoen, och wann en zousätzlech eng Roll bei der Ausféierung vun der Moosnam vun der elektronescher Iwwerwaachung spille kann.

Am Fall wou den Detenu eng speziell Betreiwung brauch déi net vum CPG oder vum CPL assuréiert ka ginn, wat ganz exceptionell ass, mussen och hei d'Krittäre vum Artikel 673, Paragraph 2 vum Code de procédure pénale berécksichtegt ginn. Den Delegéierte berécksichtegt och hei dann d'Perséinlechkeet vum Verurteelten, säi Gesondheitszoustand, säi Liewensëmfeld, säi Verhalen a seng Entwécklung am



Prisong, seng Efforten am Hiblék op seng Reintegratioun, d'Preventioun vun der Réckfällgkeet, de reelle Risiko vun enger Fluchtgefor, d'Astellung vum Verurteelte vis-à-vis vum Affer souwéi de Schutz an d'Interesse vun dësem, sou wéi och d'Anhale vum fräiwëllegen Integratiounsplang.

**4. Ass et korrekt, datt finanziell Obligatiounen, wéi zum Beispill Geldstrofen oder Indemnitéiten un d'parties civiles, mussen ofgeschloss sinn, éiert een Antrag op elektronesch Iwwerwaachung berécksiichtegt gëtt ?**

Fir e Placement ënner elektronesch Iwwerwaachung accordéiert ze kréien, ass d'Bezuele vu Geldstrofen, Geriichtskäschten a Schuedenersaz un d'Zivilparteie keng gesetzlech Obligatioun. Et kann awer an d'Decisioun afléissen, ob eng elektronesch Iwwerwaachung accordéiert gëtt oder net, op Basis vum Artikel 673, Paragraph 2, vum Code de procédure pénale, besonnesch wann eng Demande fir esou eng elektronesch Iwwerwaachung vun engem Detenu am Laf vun der Exekutioun vun der Prisongsstrof gestallt gëtt.

Et gëtt awer och drop higewisen, datt d'Moosnam vun der elektronescher Iwwerwaachung et heiansdo erméiglecht, d'Bezuele vu Geriichtskäschten, Geldstrofen a Schuedenersaz un d'Zivilparteien ze vereinfachen, well déi verurteelt Persoun am beschte Fall hir Aarbecht ka bäibehalen oder nees kann ophuelen an doduerch e méi héicht Akommes huet wéi dat, wat si am CPL oder am Kader vun enger Beschäftegung am CPG géif kréien.

Lëtzebuerg, den 27 Mee 2026

D'Justizministesch

(s.) Elisabeth Margue